

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијси савјет

ZAKLJUČAK
o obustavljanju Prijave namjere koncentracije privrednog subjekta
"Klas" d.d. Sarajevo i privrednog subjekta "Sprind" d.d. Sarajevo

Sarajevo,
Juni, 2008. godine



Broj: 01-01-26-034-50-II/07
Sarajevo: 12.06.2008. godine

Na osnovu člana 25. stav (1) tačka e) i člana 42. tačka g) a u vezi sa čl. 12., 14. i 16. Zakona o konkurenciji ("Službeni glasnik BiH", br. 48/05 i 76/07), po Prijavi namjere koncentracije podnesenoj dana 03.10.2007. godine, pod brojem: 01-01-26-034-II/07, kojom privredni subjekt "Klas" d.d. Sarajevo, Paromlinska 43, Sarajevo, namjerava kupovinom većine dionica steći kontrolu nad privrednim subjektom "Sprind" d.d. Sarajevo, Rajlovačka cesta bb Rajlovac - Sarajevo, Konkurencijsko vijeće na 67. (šezdeset i sedmoj) sjednici, održanoj dana 12.06.2008. godine, je donijelo

Z A K L J U Č A K **o obustavljanju Prijave namjere koncentracije**

1. Obustavlja se postupak po Prijavi namjere koncentracije kojom privredni subjekt "Klas" d.d. Sarajevo, Paromlinska 43, Sarajevo, namjerava kupovinom većine dionica steći kontrolu nad privrednim subjektom "Sprind" d.d. Sarajevo, Rajlovačka cesta bb Rajlovac – Sarajevo, radi povlačenja javne ponude dionica kao pravnog osnova navedene koncentracije.
2. Ovaj Zaključak je konačan i bit će objavljen u „Službenom glasniku Bosne i Hercegovine“, službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 03.10.2007. godine, pod brojem: 01-01-26-034-II/07 zaprimilo Prijavu namjere koncentracije (u daljem tekstu: Prijava) od strane privrednog subjekta "Klas" d.d. Sarajevo, Paromlinska 43, Sarajevo (u daljem tekstu: "Klas" ili Podnosilac prijave) kojom namjerava steći kontrolu kupovinom većine dionica privrednog subjekta "Sprind" d.d. Sarajevo, Rajlovačka cesta bb, Rajlovac - Sarajevo (u daljem tekstu: "Sprind").

Uvidom u dostavljenu Prijavu Konkurencijski vijeće je utvrdilo da ista nije kompletna u smislu člana 30. Zakona o konkurenciji (u daljem tekstu: Zakon) i Odluke o načinu podnošenja prijave i kriterijumima za ocjenu koncentracija privrednih subjekata ("Službeni glasnik BiH", broj: 95/06) te je zatražilo dopunu Prijave dana 25.10.2007. godine pod brojem: 01-01-26-034-2- II/07, dana 23.11.2007. godine pod brojem: 01-01-26-034-4- II/07 i dana 17.12.2007. godine pod brojem: 01-01-26-034-10- II/07.

Podnosilac prijave je u skladu sa zahtjevima Konkurencijskog vijeća dostavio dopunu Prijave dana 26.10.2007. godine pod brojem: 01-01-26-034-3-II/07 i dana 30.11.2007. godine pod brojem: 01-01-26-034-5-II/07.

Potvrda o kompletnoj i urednoj prijavi, u smislu člana 30. stav (3) Zakona izdana je dana 14.01.2008. godine pod brojem: 01-01-26-034-11-II/07.

Podnosilac prijave je aktom zaprimljenim dana 15.01.2008. godine, pod brojem: 01-01-26-034-13-II/07, obavjestio Konkurencijsko vijeće da je u međuvremenu došlo do promjene vlasničke strukture privrednog subjekta "Sprind". Naime, Podnosilac prijave je kupovinom dionica na berzi dana 27.12.2007. godine, stekao 48,9989% dionica privrednog subjekta "Sprind". Navedeno sticanje dionica upisano je 03.01.2008. godine kod Registra vrijednosnih papira Federacije BiH.

Podnosilac prijave je obavjestio Konkurencijsko vijeće, aktom zaprimljenim pod brojem: 01-01-26-034-24-II/07 od 18.02.2008. godine, o objavljivanju tender ponude za kupovinom dodatnih (..)**¹% dionica privrednog subjekta "Sprind", uz koji je priloženo i Rješenje broj: 04/3-19-23/08 od 14.02.2008. godine Komisije za vrijednosne papire FBiH, kojim se odobrava tender ponuda, kao i objavljena tender ponuda u dnevnim novinama. Nakon ove obavjesti, a zbog promjene pravnog osnova koncentracije, Konkurencijsko vijeće je dopisom broj: 01-01-26-034-26-II/07 od 21.02.2008. godine, u skladu sa promjenjenim okolnostima, tražilo dopunu Prijave namjere koncentracije. Tražena dopuna je zaprimljena od strane Konkurencijskog vijeća dana 29.02.2008. godine, pod brojem: 01-01-26-034-28-II/07.

Konkurencijsko vijeće je na osnovu člana 16. stav (3) Zakona, dana 21.03.2008. godine, objavilo u dnevnim novinama Obavještenje o pokretanju postupka po Prijavi namjere koncentracije. U ostavljenom roku od 8 dana Konkurencijsko vijeće nije primilo ni jedan pisani komentar u vezi sa predmetnom koncentracijom.

Obzirom da se na osnovu dostavljenih i prikupljenih podataka nije moglo donijeti rješenje u skladu sa članom 18. stav (5) Zakona, to je Konkurencijsko vijeće dana 13.03.2008. godine, pod brojem: 01-01-26-034-30-II/07, a u skladu sa članom 32. stav (1) Zakona, donijelo Zaključak o pokretanju postupka.

Nakon donošenja navedenog Zaključka, Podnosilac prijave je aktom zaprimljenim dana 15.04.2008. godine, pod brojem: 01-01-26-034-44-II/07 obavjestio Konkurencijsko vijeće da je dana 15.04.2008. godine povučena tender ponuda za kupovinu dionica privrednog subjekta "Sprind".

Konkurencijsko vijeće je od Podnosioca prijave tražilo da se isti izjasni da li i dalje ostaje pri Prijavi, kao i o pravnom osnovu koncentracije. Na navedene zahtjeve Konkurencijskog vijeća, Podnosilac prijave je odgovorio aktom zaprimljenim dana 28.04.2008. godine, pod brojem: 01-01-26-034-46-II/07, kojim je potvrdio da ostaje pri podnesenoj Prijavi, te aktom zaprimljenim dana 14.05.2008. godine, pod brojem: 01-01-26-034-46-II/07, u kojem se Podnosilac prijave nije eksplicitno izjasnio šta je novi pravni osnov koncentracije. Naime, Podnosilac prijave smatra da objavljivanje niti povlačenje tender ponude nema odlučujućeg uticaja na pravni osnov predmetne koncentracije. Također navodi da se odredbama Zakona i Odluke o načinu podnošenja prijave i kriterijumima za ocjenu koncentracija privrednih subjekata ne isključuje niti onemogućava podnošenje prijave namjere koncentracije prije objavljivanja tender ponude za preuzimanje.

1. Učesnici koncentracije

Učesnici predmetne koncentracije su privredni subjekt "Klas" d.d. Sarajevo, Paromlinska 43., Sarajevo i privredni subjekt "Sprind" d.d. Sarajevo, Rajlovačka cesta bb, Rajlovac - Sarajevo.

¹ (..)** - Podaci predstavljaju poslovnu tajnu

1.1. Privredni subjekt "Klas"

Privredni subjekt "Klas" d.d. Sarajevo, je dioničko društvo sa sjedištem u Sarajevu, Paromlinska 43. Predmet poslovanja je prerada žitarica, brašna, proizvodnja prehrambenih i konditorskih proizvoda, ugostiteljstvo i turizam, vanjska trgovina i trgovina na veliko i malo.

Privredni subjekt "Klas" upisan je u sudski registar Kantonalnog suda Sarajevo, rješenjem broj: UF/I-1126/02 od 26.02.2003. godine, sa matičnim registarskim brojem 1-13235.

Prema podacima iz Registra vrijednosnih papira u Federaciji BiH na dan 29.02.2008. godine, vlasnička struktura privrednog subjekta "Klas" prikazana je u Tabeli br. 1.

Tabela br. 1

| R.b. | Naziv privrednog subjekta | Vlasnički udio (%) |
|---------|--|--------------------|
| 1. | "Sarajevska pivara" d.d. Sarajevo | 43,8840 |
| 2. | Investicioni fond "Naprijed" d.d. Sarajevo | 19,2999 |
| 3. | Investicioni fond "Herbos fond" d.d. Mostar | 8,6344 |
| 4. | Investicioni fond "Prevent Invest" d.d. Sarajevo | 4,4295 |
| 5. | Investicioni fond "Crobih fond" d.d. Mostar | 3,2432 |
| 6. | Investicioni fond "Mi-Group" d.d. Sarajevo | 2,9455 |
| 7. | "Raiffeisen bank" d.d. BiH Sarajevo | 2,3793 |
| 8. | Investicioni fond "Bosfin" d.d. Sarajevo | 1,1829 |
| 9. | Investicioni fond "Fortuna fond" d.d. Bihać | 1,0373 |
| 10. | "Danske fund" Luksemburg | 0,8378 |
| 11. | Ostali mali dioničari | 12,1262 |
| UKUPNO: | | 100,00 |

Prema podacima iz Prijave, subsidijarna društva u kojima privredni subjekt "Klas" ima preko 10% vlasničkog udjela, prikazani su u Tabeli br. 2.

Tabela br. 2

| R.b. | Naziv subsidijarnog društva | Vlasnički udio privrednog subjekta "Klas" (%) |
|------|--|---|
| 1. | "Klass-Con" d.o.o Sarajevo | (..)** |
| 2. | "Gradska pekara" d.o.o. Novi Travnik | (..)** |
| 3. | "Pekare" d.d. Ljubače-Tuzla | (..)** |
| 4. | Mlin "Husinski rudar" d.d. Ljubače-Tuzla | (..)** |
| 5. | "Pekar" d.d. Kakanj | (..)** |
| 6. | "Dobrinja" d.d. Ilidža | (..)** |
| 7. | "Žitozajednica" d.o.o. Sarajevo | (..)** |

1.2. Privredni subjekt "Sprind"

Privredni subjekt "Sprind" d.d. Sarajevo, je dioničko društvo sa sjedištem u Sarajevu, Rajlovačka cesta bb, Rajlovac - Sarajevo. Predmet poslovanja je proizvodnja i prodaja hljeba i peciva, zamrznutih polugotovih jela na bazi tijesta i slastičarskih proizvoda.

Privredni subjekt "Sprind" upisan je u sudski registar Kantonalnog suda Sarajevo, rješenjem broj broj: UF/I-161/02 od 22.10.2002. godine, sa matičnim registarskim brojem 1-1589.

Privredni subjekt "Klas" je berzanskom transakcijom od 27.12.2007. godine stekao 48,9989% dionica u osnovnom kapitalu privrednog subjekta "Sprind", i prema podacima iz Registra vrijednosnih papira u Federaciji BiH na dan 29.02.2008. godine, vlasnička struktura prikazana je u Tabeli br. 3.

Tabela br. 3

| R.b. | Naziv privrednog subjekta | Vlasnički udio (%) |
|----------------|--|--------------------|
| 1. | "Klas" d.d. Sarajevo | 48,9989 |
| 2. | Investicioni fond "Naprijed" d.d. Sarajevo | 23,5794 |
| 3. | "Sarajevska pivara" d.d. Sarajevo | 15,9158 |
| 4. | Investicioni fond "Herbos fond" d.d. | 2,9822 |
| 5. | "Dijamant" d.o.o. Sarajevo | 0,3173 |
| 6. | Fizičko lice Čorbo Salem, Sarajevo | 0,2855 |
| 7. | Fizičko lice Ivačić Dušan, Sarajevo | 0,2679 |
| 8. | Fizičko lice Stašević Radenka, Sarajevo | 0,2644 |
| 9. | Fizičko lice Zorić Božo, Sarajevo | 0,2468 |
| 10. | Fizičko lice Omerbegović Ibro, Ilidža | 0,2291 |
| 11. | Ostali mali dioničari | 6,9127 |
| UKUPNO: | | 100,00 |

Privredni subjekt "Sprind" nema vlasničkog udjela u drugim privrednim subjektima, niti registrovanih subsidijarnih društava u Bosni i Hercegovini.

2. Pravni osnov i oblik koncentracije

Podnosilac prijave je u Prijavi naveo kao pravni osnov koncentracije Odluku nadzornog odbora privrednog subjekta "Klas", broj: 6189/07 od 17.08.2007. godine, kojom se odobrava namjera da "Klas" kupi (...)**% dionica privrednog subjekta "Sprind", od privrednog subjekta (...)**. Namjeravana kupovina dionica bi se obavila putem Sarajevske berze.

Podnosilac prijave je Konkurencijskom vijeću dostavio nove činjenice u pogledu načina sticanja dionica u privrednom subjektu "Sprind". Naime, dana 27.12.2007. godine, privredni subjekt "Klas" je kupio 48,9989% dionica privrednog subjekta "Sprind" od ranijeg većinskog vlasnika, privrednog subjekta Sarajevska pivara. Komisija za vrijednosne papire Federacije BiH je Rješenjem broj: 04/3-19-23/08 od 14.02.2008. godine odobrila tender ponudu za preuzimanje privrednog subjekta "Sprind", namjeravanom kupovinom dodatnih (...)**% dionica od strane privrednog subjekta "Klas". Tender ponuda je objavljena u dnevnim novinama "San" od 16.-17.02.2008. godine

U skladu sa navedenim podacima iz Prijave a na osnovu člana 16. stav (1) Zakona, pravni osnov predmetne koncentracije je javna ponuda dionica kojom će privredni subjekt "Klas" postati većinski vlasnik privrednog subjekta "Sprind". Poslije provođenja predmetne koncentracije privredni subjekt "Klas" postat će vlasnik (...)**% ukupnog broja dionica u privrednom subjektu "Sprind".

Međutim, kako je već navedeno, dana 15.04.2008. godine od strane Podnosioca prijave povučena je tender ponuda za kupovinu dionica privrednog subjekta "Sprind", pa se javna ponuda za preuzimanje privrednog subjekta "Sprind", kupovinom većine dionica, više ne može smatrati pravnim osnovom koncentracije.

Pravni oblik koncentracije u skladu sa članom 12. stav 1. tačka b) Zakona o konkurenciji, predstavlja sticanje kontrole jednog privrednog subjekta nad drugim kupovinom većine dionica.

Kako je tender ponuda za kupovinom dionica povučena dana 15.04.2008. godine, time je prestao da postoji pravni osnov predmetne koncentracije u smislu Zakona.

Odluka nadzornog odbora privrednog subjekta "Klas" broj 6189/07 od 17.08.2007. godine, kojom je izražena namjera da se putem kupovine većine dionica stekne kontrola nad privrednim subjektom "Sprind", ne može se smatrati pravnim osnovom, s obzirom da predstavlja namjeru za činjenjem radnji u budućnosti i kao takva nije propisana članom 16. stav (1) Zakona, a u vezi s članom 8. tačka f) Odluke o načinu podnošenja prijave i kriterijumima za ocjenu koncentracija privrednih subjekata.

Nakon izvršene analize navedenih podataka utvrđeno je da Prijava nema pravni osnov za obavezu podnošenja Prijave namjere koncentracije u smislu člana 12. stav (1) pod b) i Konkurencijsko vijeće je odlučilo kao u dispozitivu ovog Zaključka.

POUKA O PRAVNOM LIJEKU

Protiv ovog Zaključka nije dopuštena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 (trideset) dana od dana prijema ovog Zaključka, odnosno od dana njegovog objavljivanja u "Službenom glasniku BiH".

Predsjednik

Ibrica Lakišić